

# Malaysia, Iran meterai MoU tingkat kerjasama sektor pertanian

UM - 20/6/07

TEHRAN 19 Jun - Malaysia melihat prospek yang besar bagi meningkatkan hubungan kerjasama dengan Iran khususnya dalam bidang pertanian, kata Menteri Pertanian dan Industri Asas Tani, Tan Sri Muhyiddin Yassin pada Isnin.

Muhyiddin yang sedang dalam rangka lawatan lima hari ke Iran mulai Isnin, berkata, terdapat ruang usahasama yang luas untuk diterokai kedua-dua negara bagi meningkatkan kerjasama yang sedia ada sektor pertanian.

Bagi mencapai matlamat ini, beliau berkata kedua-dua kerajaan Malaysia dan Iran telah bersetuju untuk memeterai perjanjian persefahaman (MoU) Kerjasama Pertanian antara kedua-dua negara.

"Saya berharap MoU akan menjadi perjanjian induk bagi meningkatkan kerjasama dalam bidang pertanian dan bagi Malaysia dan Iran mengembangkan lagi usahasama mereka," katanya memberitahu Menteri Pertanian

Iran, Mohammad-Reza Eskandari apabila kedua-duanya bersama anggota delegasi masing-masing bertemu di Kementerian Pertanian Iran di sini.

Majlis menandatangani MoU itu pada Khamis merupakan antara agenda utama lawatan Muhyiddin ke Iran.

Muhyiddin berkata, beliau berasa kagum dengan penjelasan Eskandari berhubung pengembangan pesat ekonomi Iran dan kejayaannya mencapai tahap mampu diri dalam pengeluaran makanan.

Beliau berkata, adalah penting bagi negara-negara Islam untuk memberi keutamaan dalam bidang seperti mampu diri dalam pengeluaran makanan dan keselamatan makanan.

"Tahap ini (mampu diri dalam pengeluaran makanan) adalah sesuatu yang Malaysia boleh pelajari dari Iran kerana Malaysia masih belum mencapai tahap mampu diri... kita tidak menanam gandum dan kita mengimport semua te-



**MUHYIDDIN YASSIN**

pung kita daripada luar negara," katanya.

Beliau berkata, menerusi MoU yang meliputi bidang kerjasama yang luas dalam bidang pertanian, kedua-dua negara boleh bergerak ke hadapan dengan mewujudkan kumpulan kerja bersama atau jawatankuasa bersama.

Beliau berharap kumpulan kerjasama akan dapat mengadakan mesyuarat pertamanya sebelum akhir tahun ini dan Malaysia sudah menawarkan diri untuk menjadi tuan rumah bagi mesyuarat pertama itu.

Muhyiddin turut menjemput Eskandari untuk melawat Malaysia.

Menteri Pertanian dan Industri Asas Tani yang diiringi isterinya, Puan Sri Noor Ai Nee Abdul Rahman, tiba di sini pada Isnin.

Antara anggota delegasi rombongannya ialah Timbalan Ketua Setiausaha (Perancangan) kementerian, Ibrahim Muhammad, Ketua Pengarah Jabatan Pertanian, Datuk Sofian Mohd. Salleh, Ketua Pengarah Institut Penyelidikan dan Pembangunan Pertanian (Mardi), Datuk Dr. Abdul Shukor Abdul Rahman dan Timbalan ketua Pengarah (Pembangunan) Jabatan Perkhidmatan Haiwan, Datuk Dr. Ahmad Suhaimi Omar.

- Bernama